

Abdulatif A. ALLOQULOV,
Head of the Maturidiyya Studies
Department of the Imam Maturidi
International Scientific Research Center.
A.Kadiri str. 11, 100011, Tashkent, Uzbekistan.
E-mail:alloqulovabdullatif@gmail.com

DOI: 10.47980/MOTURIDIY/2022/3/3

**XII–XIII АСРЛАР МОТУРИДИЙЛИК
ТАЪЛИМОТИГА ОИД МАНБАЛАРДА
“ИМОН” ТУШУНЧАСИНИНГ
ЁРИТИЛИШИ**

**EXPLANATION OF THE CONCEPT
OF “FAITH” IN THE SOURCES OF THE
DOCTRINE OF MATURIDIYYA WRITTEN
IN THE XII–XIII CENTURIES**

**ОБЪЯСНЕНИЕ ПОНЯТИЯ “ВЕРА”
В ИСТОЧНИКАХ, СВЯЗАННЫХ
С УЧЕНИЕМ МАТУРИДИЗМА
XII–XIII ВЕКОВ**

КИРИШ.

إعان [ийманун] “тасдиқлаш” (Абул Муин Насафий, 2011) сўзи [амана] “тасдиқлади” феълининг масдари бўлиб, у тўртинчи бобда бир ёки икки мағъул (тўлдирувчى)га ўтимли бўлади. Масалан, “Зайдни тасдиқладим” жумласи араб тилида آمنت زیدا [аманту Зайдан] бўлади. “Зайдга Амрни тасдиқлатдим” жумласи эса, араб тилида آمنت زیدا عمروا [аманту Зайдан Амрон] шаклида ифодаланади.

“Имон” сўзининг луғавий маъноси борасида XII–XIII асрларда яшаб ижод қилган мовоароннахрлик мутакаллимлардан Абул Муин Насафий (ваф. 508/1114), Абу Сано Маҳмуд ибн Зайд Ломиший (ваф. VI/XII асрнинг биринчи ярми), Алоуддин Мухаммад ибн Абдулҳамид Усмандий (ваф. 552/1157), Жалолиддин Умар ибн Муҳаммад Хаббозий (ваф. 691/1291), Шамсиддин Самарқандий (ваф. 705/1305), Абул Баракот Насафий (ваф. 710/1310), Ҳусомиддин Ҳусайн ибн Али Сигноқий (ваф. 714/1314) каби олимлар баҳс юритганлар. Бироқ Саффор Бухорий (ваф. 534/1139), Али ибн Усмон Ўший (ваф. 575/1179), Абу Бақр Косоний (ваф. 587/1191), Нуриддин Собуний (ваф. 580/1184), Абу Муҳаммад Рукниддин Убайдулло ибн Муҳаммад Самарқандий (ваф. 701/1301)лар ўзларининг ақида илмига оид асарларида “имон”

сўзининг луғавий маъносига тўхталмаганлар (Саффор Бухорий, 2011).

Бундан маълум бўладики, айрим олимлар ўзларининг ақида соҳасига бағишлиланган асарларида “имон” сўзининг луғавий маъносига тўхталиш оркали, унинг истилоҳий маъноси билан боғлиқлик жихатини кўрсатиб беришга уринган бўлсалар-да, бошқа олимлар унинг фақат истилоҳий маъноси билангина чекланганлар.

Бу феъл ўзи мустақил ёки предлоглар билан ҳам ўтимли бўлиши мумкин. Масалан، وَآتَنَّهُمْ مِنْ حَوْفٍ [ва аманаҳум мин хавфин] “ва хавф (ва хатар) дан хотиржам қилди” (Қураиши сураси, 4-) оятида “амана” феъли ўзи мустақил ўтимли бўлган. У “ба” ва “лам” ҳарфлари билан ҳам ўтимли бўлади. “Ба” ҳарфи билан ўтимли бўлишига қуидаги оятни мисол қилиб келтириш мумкин:

آمنَ الرَّسُولُ بِمَا أَنْزَلَ إِلَيْهِ مِنْ رَبِّهِ وَالْمُؤْمِنُونَ

“Пайғамбар унга ўз Раббидан туширилган нарсага имон келтириди ва мўминлар ҳам” (Бақара сураси, 285-оят).

“Амана” феъли “лам” ҳарфи билан ўтимли бўлса, у “тасдиқ қилиш” маъносида бўлади:

لَنْ تُؤْمِنَ لَكَ حَتَّىٰ نَرَى اللَّهَ جَهَنَّمَ

“Эй Мусо, Аллоҳни очик-равшан кўрмаганимизча сенга ишонмаймиз” (Бақара сураси, 55-оят).

АСОСИЙ ҚИСМ

“Имон” сўзининг истилоҳий маъноси борасида тарихда турли қарашлар илгари сурилган. Жумладан, Имом Молик (ваф. 179/795), Имом Шофеий (ваф. 204/820), Имом Авзой (ваф. 157/774) ва мухаддислардан Аҳмад ибн Ҳанбал (ваф. 241/855), Исҳоқ ибн Роҳавайҳ (ваф. 238/853), Суфён Саврий (ваф. 161/778), Довуд ибн Али Исфаҳоний (ваф. 270/884), мутакаллимлардан Ҳорис ибн Асад Муҳосибий (ваф. 243/857), Абул Аббос Қалонисий (ваф. IX асрнинг бошлари), Ибн Али Сақафий (ваф. 328/940), Ибн Ҳазм Андалусий (ваф. 406/1064)лар: “Имон – қалб маърифати, тил икрори ва арконларга амал қилишdir”, деганлар (Абул Муин Насафий, 2011). Абул Баракот Насафий мазкур олимларнинг имонга берган таърифларидаги “қалб маърифати” ибораси ўрнига “қалб тасдиги” атамасини қўллаган (Абул Баракот Насафий, 2011). Бироқ, салафлар ўз замоналарида

Аннотация. Имон ва унга тегишили масалалар Құръон ва ҳадисда содда, түшунарлы тарзда баён қылиб берилған бўлиб, саҳобалар даврида у мураккаб хусусиятга эга бўлмаган. Бироқ кейинги даврларда турли оқимларнинг пайдо бўлиши, турли дин вакилларининг исломга кириши, юонон фалсафаси тарқалган ҳудудларда ислом динининг тарқалиши натижасида “имон” сўзининг истилоҳий таърифидан тортиб, унга тегишили барча масалалар мураккаблаштирилиб таҳлил қилинганд. Бу, ўз навбатида, “такfir” масаласининг ўртага чиқшишига замин яратган.

Мақолада аҳли сунна валижамоа уламоларининг имонга берган таърифи, хорижийлик ва мұтазилийлик вакилларининг талқини, аҳли ҳадислар, шофеийлар томонидан имонга берилған таърифнинг ўзига хос хусусиятлари таҳлилий тадқиқ қилинганд. Шунингдек, мақолада мотуридийлик таълимомт вакиллари ҳамда муржисийлар томонидан имонга берилған таърифнинг ўхшаш ва фарқли жиҳатлари ўрганилган. Аҳли ҳадисларининг имонга берган таърифи билан шофеийлар томонидан берилған таърифидаги ўхшашлик ва фарқли ўринлари таҳлил қилинганд.

“Имоннинг зиёда бўлиши”, “амал имоннинг таркибий қисми ёки эмаслиги” каби масалалар мотуридийлик ва ашъарийлик таълимомтлари орасида ўзаро қиёслаб ўрганилган ҳамда мазкур масалаларининг тарихий жиҳатлари ёритилган. Умуман олиб қараганды, мақолада бугунги кунда пайдо бўлган турли оқимларнинг имон борасидаги қараишлари тарихий илдизлари билан асосли равишда очиб берилган. Шунингдек, унда мотуридийлик манбаларининг ақида мавзуларини ёритишдаги услубияти, ривожланиши босқичлари таҳлил қилинганд.

Калит сўзлар: имон, ақида, калом, имонда истисно, имоннинг зиёда ва нуқсонли бўлиши, имон камайиб-кўпайиб туриши, амал, амал имоннинг таркибий қисми.

Abstract. *Faith and issues related to it are explained in a simple and understandable way in the Qur'an and hadith, and it was not complicated in the time of the Companions. However, in the later periods, as a result of the emergence of different currents, the conversion of representatives of different religions to Islam, and the penetration of Islam into the regions where Greek philosophy was spread, all faith-related issues, starting from the definition of the word "faith" were analyzed in a complicated way. This, in turn, created the basis for the emergence of the issue of takfir.*

In the article, the definition of faith given by the imams of the people of Sunnah, the interpretation of the Kharjites and Mu'tazilites, the specific characteristics of the definition of faith given by the people of hadith, and the Shafii's are analytically studied. Also, the article examines the similarities and differences between the definition given to faith by the doctrine of Maturidiyya and the definition given by the Murjiis. The similarities and differences between the definition of faith given by the Ahl al-Hadith and the Shafii's were analyzed.

Issues such as “increasing of faith”, “whether action is a component of faith or not” were compared among the doctrines of Maturidiyya and Ash'ariyya, and the historical aspects of these issues were studied. In general, the article reveals the views on faith by the various sects that have emerged today, together with their historical roots. It also analyzes the methodology of Maturidiyya sources in covering the topics of creed and its stages of development.

Keywords: faith, creed, kalam, exception in faith, increase and deficiency of faith, decrease and increase of faith, deed, deed is a component of faith.

Аннотация. Вера и вопросы, связанные с ней, объясняются в Коране и хадисах просто и понятно, и во времена сподвижников это не было сложным. Однако в более поздние периоды, в результате возникновения разных течений, приобщения к исламу представителей разных религий, проникновения ислама в районы распространения греческой философии, все вопросы, связанные с ней, начиная с определения слова “вера” были усложнены и подвергнуты анализу. Это, в свою очередь, создало основу для возникновения проблемы тақфира.

В статье на основе анализа исследуются особенности определения веры, данное имамами Ахль Сунны, толкование хариджитов и мутазилитов, Ахль аль-Хадисом (сторонниками преданий), а также шафиитами. Также в статье рассматриваются сходства и различия между определением веры, данным учением матуридизма, и определением, данным мурджиситами. Проанализированы сходства и различия между определением веры, данным Ахль аль-Хадисом, и шафиитским определением веры.

Были сопоставлены такие вопросы, как “умножение веры”, “является ли действие составной частью веры” среди ученик Матуриди и Ашари, изучены исторические аспекты этих вопросов. В целом в статье раскрываются исторические корни воззрений на веру различных течений, возникших сегодня. Также анализируются методология и этапы развития матуридских источников в освещении темы веры.

Ключевые слова: вера, символ веры, наука калам, исключение в вере, избыток и недостаток веры, уменьшение и увеличение веры, дело, поступок является составной частью веры.

“қалб маърифати” билан “қалб тасдиғи”ни синоним сифатида талқин қилганлар. Кейинги даврга келиб, ушбу икки ибора орасида фарқланиш юзага келган, жумладан, жаҳмийларнинг имонга берган таърифларида айни шу фарқни инобатга олиш керак бўлади. Бу ахли сунна валжамоага мансуб олимларидан иборат бир гуруҳнинг қараши ҳисобланади.

Ахли сунна валжамоадан ажралиб чиқсан илк оқимлардан хорижийлик ҳамда мўътазилийлик намояндалари: “Имон – қалб тасдиғи, тил иқрори ва арконларга амал қилишдир”, деганлар. Хорижийлик ва мўътазилийлик оқими орасида имон таърифида бироз фарқ мавжуд. Жумладан, хорижийлар барча тоатни имон, маъсиятни эса куфр деб эътиқод этадилар. Балоғатга етган кишидан тоат ҳам, маъсият ҳам содир бўлса, у мўмин эмас, коғир бўлади деб ҳисоблайдилар. Аксарият мўътазилийлар: “Имон нафл ва фарз ибодатларнинг мажмуасидир”, деганлар. Уларнинг айримлари эса, имон фақат фарз ибодатларни ўз ичига қамраб олади, деб таъкидлаганлар (Алоуддин Усмандий, 2019). Умуман олиб қараганда, хорижийлар гуноҳи кабира қилган кишини коғир, мўътазилийлар эса, уни “байнал манзилатайн” да қолади, деб даъво қиласидилар.

Муржийлик тармоқларидан шамрия¹, нажжория² ва ғайлония оқимлари тарафдорлари: “Имон – қалб маърифати, тил иқроридан иборат”, деганлар (Абул Муин Насафий, 2011). Шу ўринда, “маърифат” ва “тасдиқ” сўзларига ойдинлик киритиб олиш керак бўлади. “Маърифат”нинг антоними жаҳолат ҳисобланади. “Тасдиқ” сўзининг антоними эса “инкор”дир. Киши имон ва унга тегишли нарсалар борасида маълумотга эга бўлмай ҳам имон келтириши мумкин. Бундай кишилар тақлидий мўмин деб номланадилар. Бу ҳақда кейинроқ сўз юритилади. Инсон ислом ҳақида маърифатга эга бўлиб, мўмин бўлмаслиги мумкин. Бунинг мазмуни қуйидаги оятда ўз аксини топган:

الَّذِينَ آتَيْنَاهُمُ الْكِتَابَ يَعْرُفُونَهُ كَمَا يَعْرُفُونَ أَبْنَاءَهُمْ.

“Китоб берилгандар уни худди болаларини танигандек танийдилар” (Бақара сураси, 146-оят).

¹ Нажжория – Ҳусайн ибн Мухаммад Нажжор (ваф. 220/835) томонидан асос солинган ва бир неча тоифага бўлинниб кетга фирмә. Бу фирмә “Аллоҳ таолонинг сифатини инкор қилиш”, “Банда ўз феълини яратувчиси” каби масалаларда мўътазилийлик фирмәси билан ҳамфир ҳисобланади.

² Ғайлония – Ғайлон ибн Муслим Қадарий Димашкий (ваф. 105/723) томонидан асос солинган фирмә.

Абу Ҳанифа (ваф. 150/767) “ал-Фиқҳ ал-акбар”да: “Имон иқрор ва тасдиқдан иборатдир”, деган (Абу Ҳанифа, 2004). Олим “Васияту Аби Ҳанифа” китобида эса: “Имон тил иқрори ҳамда қалб тасдиғидан иборат. Иқрорнинг ўзи имон бўлмайди. Акс ҳолда, муноғиқларнинг барчаси мўмин бўлар эди. Шунингдек, тасдиқнинг ўзи ҳам имон бўлмайди. Шундай бўлганида, ахли китобларнинг барчаси мўмин бўлар эдилар”, деган. Абу Ҳанифадан имоннинг таърифи борасида нақл қилинган энг машҳур сўз шу ҳисобланади. Унинг баъзи издошлари: “Имон қалб маърифати ва тил иқрори”, деганлар (Абул Муин Насафий, 2011). Бироқ улар “қалб маърифати” иборасини “қалб тасдиғи” маъносида талқин қилган бўлишлари мумкин. Жумладан, Нуриддин Собуний шундай деган: “Бизнинг асҳобларимиздан аксарияти: “Имон қалб тасдиқи ва тил иқроридан иборат”, деганлар (Нуриддин Собуний, ал-Кифоя фи ал-Хидоя, 2014). Абу Бакр Косоний айтади: “Ханафий олимларидан Шамсул аимма Сарахсий (ваф. 490/1097) “Усул ас-Сарахсий” ва Фахрул ислом Паздавий (ваф. 482/1089) “Усул ал-Фиқҳ” асарларида имоннинг руқнига тил иқрорини киритиб, уни қалб тасдиғи каби имоннинг иккинчи руқни, деб билганлар” (Алоуддин Косоний, 2021). Бироқ икки олим ҳам тил тасдиғининг узрли ўринларда тушиб қолишини айтиб, уни “ҳасанун ли ғойрих” (ўзи чиройли эмас, бошқа нарса сабабли чиройли), деб қабул қилганлар. Бу бир жиҳатдан, Имом Мотуридий (ваф. 333/945)нинг “имон” таърифи борасидаги қарашини қўллаб-кувватлайди.

Ломиший бу ҳақда шундай деган: “Барча ахли сунна уламолари: “Имон тил иқрори, қалб тасдиғи ҳисобланиб, бу қалб тилни тасдиқ қилиши билан изоҳланади. Зоро, қалб тасдиғи имоннинг ҳақиқати рўёбга чиқиши учун ҳам зарурийдир... Қолаверса, шариат ҳукмлари жорий қилиниши учун албатта иқрор шартдир”, деганлар (Ломиший, 1995).

Мулла Али Қорий бу ҳақда қуйидагиларни ёзган: “Киши қалбидаги имонни айтишга қодир бўлатуриб, унинг зиддини айтса, бу унинг эътиқоди ўзгарганига далил бўлади. Иқрор имоннинг бор ёки йўқлигини ифодаловчи имон руқни ҳисобланади. Чунончи, Шамсул аимма Сарахсий буни очик айтган. Лекин “ал-Умда” асари муаллифи Абул Баракот Насафий: “Иқрор ҳукмларни ижро қилиш учун шарт”, деган. Бу ашъарийларнинг ҳам эътиқоди бўлиб, Абу Мансур Мотуридий ҳам айни шу эътиқодда бўлган”.

Мўътазилийлардан Бишр ибн Марисий (ваф. 217/733), Ибн Ровандий (ваф. 298/911)лар: “Имон

лугатда “тасдик” маъносида бўлиб, тасдиқсиз имон юзага чиқмайди. Шу боис киши мўмин бўлиши учун қалб ва тил тасдиги шартдир”, деганлар (Абул Муин Насафий, 2011).

Басралик шоир Фазл ибн Абдуссамад Рақоший (ваф. 200/815) аҳли сунна имомларидан Абдуллоҳ ибн Саид Қаттон Куллобий³ (ваф. 240/855), ва карромийлар: “Имон фақат тил билан ҳосил бўлади”, деганлар. Бироқ улар ўртасида ихтилоф мавжуд. Жумладан, Рақоший киши мўмин бўлиши учун тил икрори билан қалб маърифати ҳам шарт, деган. Абдуллоҳ ибн Саид ундан фарқли равишда, “Имон қалб маърифати, қалб тасдиги ва тил икрори билан юзага чиқади”, деган. Карромийлар эса, имон фақат тил икроридан иборат, деганлар. Уларнинг талқинида имон келтириладиган нарсаларни қалбда инкор қилиб, тил билан уларни икрор қилган киши мусулмон бўлади. Шунинг учун ҳам, карромийлар саҳобийлар давридаги мунофиқларни мўмин деб билганлар (Абул Муин Насафий, 2011). Улар ўз фикрларини асослаш учун “Мен одамлар “Лаа илаха иллаллоҳ”, деб айтмагунларича, уларга қарши урушишга буюрилдим”, деган ҳадисни далил қилиб келтиргандар.

Жаҳмийлик таълимоти асосчиси Жаҳм ибн Сафрон (ваф. 128/746) ва қадарийлар етакчиларидан бири Абул Ҳусайн Солиҳий: “Имон қалб маърифати”, деган (Абул Муин Насафий, 2011).

Ином Абу Ҳанифа (ваф. 150/767)нинг икки қавлидан бирида, Абу Мансур Мотуридий, муфассир Ҳусайн ибн Фазл Бажалий (ваф. 282/896), Абул Ҳасан Ашъарий (ваф. 333/945): “Имон қалб тасдиги”, деганлар (Алоуддин Косоний, 2021). Абул Ҳасан Ашъарий имонга берган яна бир таърифи Абул Ҳусайн Солиҳийнинг талқинига ўхшайди, бироқ бу ашъарийлик таълимотида машҳур бўлмаган қарашибди. Абул Ҳасан Ашъарий ва унинг издошлари: “Кишининг имконияти бўлса, калимаи шаҳодатни айтиши шартдир”, деганлар.

Абу Бакр Косоний: “Қалб тасдиги имоннинг рукни, тил икрори борасида машойихлар ихтилоф қилганлар. Аксарият машойихлар киши соқов бўлмаса, имоннинг рукни тил билан икрор қилиш, деб таъкидлаганлар. Баъзилар эса, қалб тасдиги имоннинг рукни, икрор эса, унга далолат қилувчи нарсадир, деганлар. Айни шу қараш Абу Ҳанифадан ҳам ривоят қилинган. Абу Мансур Мотуридий эса, уни маъқул деб билган”, деган (Алоуддин Косоний, 2021).

³ У ўз даврининг машҳур мутакаллим олимлардан бири ҳисобланаби, муржиилик тарафдори бўлган. Унинг вафоти ҳақида маълумот сақланаби қолмаган.

Абу Ҳанифа ўзининг “ал-Олим ва ал-мутааллим” асарида: “Инсонлар ўзларининг маърифати ва Аллоҳ таолони тасдиқ қилишлари билан мўмин бўладилар”, деган (Абу Ҳанифа, ал-Олим ва ал-мутааллим, 2004). Бошқа ўринда эса: “Имон тасдиқ, маърифат, яқийн, икрор ва исломдир”, дейилган (Абул Баракот Насафий, 2011).

Абул Баракот Насафий “Шарҳ ал-Умда” асарида: “Абу Ҳанифа ва Абу Мансур талқинида ислом аҳкомларини жорий қилиш учун тил икрори шарт”, деган (Абул Баракот Насафий, 2011). Нуриддин Собуний келтиришича, «Муҳаққиқ асҳобларимиз: “Дунёда шаръий ҳукмлар жорий бўлиши учун тил икрори шарт”, деганлар» (Нуриддин Собуний, ал-Кифоя фи ал-Хидоя, 2014).

Бунга “имон” сўзининг луғавий маъносини далил сифатида келтириш билан бир қаторда, “Рост гапирсак ҳам, (барибир) сиз бизга ишонувчи эмассиз” (Юсуф сураси, 17-оят) ва (Фиръавн) айтди: “Мен изн бермай туриб, унга имон келтиргингизми?!?” (Тоҳа сураси, 71-) оятларига ҳам таянадилар. Шунингдек, улар Жаброил ҳадисидаги “Имон нима?” деган саволга жавобни ҳам бунга асос сифатида келтирадилар. Ломишийга кўра, куфрнинг ўрни қалб бўлгани каби, имоннинг ўрни ҳам қалбdir. Куфрнинг рукни қалб билан боғлиқ бўлганидек, имоннинг рукни ҳам қалбга боғлиқ бўлади (Абу Сано Маҳмуд ибн Зайд Ломиший, 1995).

Мулла Али Қорий (ваф. 1381/1961) имоннинг истилоҳий таърифи борасида Абу Ҳанифанинг “Васияту Аби Ҳанифа” асаридан қўйидаги ривоятни келтириб, уни таҳлил қилган:

“Имон тил билан икрор қилиш ва қалб билан тасдиқ этишдир. Икрорнинг ёлғиз ўзи имон бўла олмайди. Чунки икрорнинг ўзи имон бўлганида, мунофиқларнинг барчаси мўмин бўлиб қолар эди. Шунингдек, маърифатнинг ёлғиз ўзи ҳам имон бўла олмайди. Чунки маърифат, яъни тасдиқнинг ўзи имон бўлганида аҳли китобларнинг барчаси мўмин бўлиб қолар эди”.

Тасдиқ икрорнинг зидди ўлароқ, “ҳасан лиъанихи” рукни ҳисобланаби, ҳеч қачон бекор бўлмайди. Икрор эса имоннинг шарти, ёки бир қисми бўлиб, “ҳасан ли ғойрихи”дир. Шунинг учун, баъзан мажбурлик ва узрли вакътларда бекор бўлади. Чунки тил қалбнинг таржимонидир. Демак, тил тасдиқнинг бор ёки йўқлигига далилдир. Кишининг имон келтиришга имкони бўлатуриб, тили билан бошқа калимани айтса, у кофир ҳисобланади. Мажбурлик сабабли имонни намоён қилишнинг имкони бўлмаса, у бундай вазиятда

кофир бўлмайди. Чунки ўз жонига нисбатан хавф қалбда тасдиқнинг бўлишига хужжатдир. Уни ушбу ўзгартиришга ундовчи нарса – эътиқодни ўзгартириш эмас, ўзидан ҳалокатни буришга бўлган эҳтиёждир (Мулла Али Қорий, 2021).

Шамсиддин Самарқандий “имон”га берилган истилохий таърифда шундай деган: Мухаққиқлар: “Имон – Расулulloҳ келтирган нарсаларни тасдиқлашдир”, деганлар. Шунинг учун ижтиход орқали чиқарилган ҳукмларни инкор қилган киши диндан чиқиб қолмайди (Шамсиддин Самарқандий, 2021).

МУҲОКАМА

Юқоридаги қарашлар асосида шундай хуласага келиш мумкин, имоннинг дунёвий ва охиратга оид жиҳатлари мавжуд. Дунёвий жиҳатга имон калимасини тил билан иқрор қилишнинг ўзи кифоя қиласди. Охиратга оид жиҳатга кўра, унинг етти хил талқини мавжуд. Улардан бештаси ботил таълимотларга оид бўлса, колган иккитаси ахли сунна валжамоага тегишлидир.

Биринчиси, хорижийлик таълимотига кўра, “Имон қалб тасдиғи, тил иқрори ва руқнларга амал қилишдан иборат”. Хорижийлик таълимотига кўра, мўмин киши гуноҳи кабира билан исломдан чиқиб, кофирга айланади. Бу ислом таълимотига мутлақо зиддир. Чунки сахобалар, тобеинлар, салафи солихлар ва барча мусулмонлар “қалбида заррача ёки хардал донича имони бор киши дўзахда абадий қолмайди”, деб иттифоқ қилганлар. Шу билан бирга, улар Пайғамбаримизнинг шафоати гуноҳи кабира қилган мўминларга тегишли бўлади, деганлар. Зеро, ҳадисда “Шафоатим гуноҳи кабира қилган (мўмин-мусулмон)ларга”, дейилган. Бошқа ҳадисда эса, шундай дейилади: “Имондан зарра мисқолича қалбида бўлган киши дўзахда қолмайди”. Абу Зарр Фифорийдан нақл килингандан ривоятда: “Зино қилса, ўғирлик қилса ҳамми?” дейилган. Бу шу нарсага далолат қиласдики, гуноҳи кабирага кўл урган киши комил мўмин бўлмаса-да, белгиланган жазони олганидан кейин, албатта, дўзахдан чиқарилади.

Иккинчиси, мўътазилийлар имонга хорижийлар каби таъриф берган бўлсалар-да, бироқ мўътазилийликда гуноҳи кабира қилган киши, то тавба қилмагунича, икки манзил орасида бўлади. Уларнинг нигоҳида дўзахнинг икки даражаси орасида бир даража бор, худди имон билан куфрнинг орасида икки манзил бўлгани каби.

Ундан на холис кофир ва на холис мўмин жой олади. Балки, у гуноҳи кабира қилган кишиларнинг манзилидир.

Учинчиси, жаҳмийлар таълимотига кўра, киши мўмин бўлиши учун қалб маърифатининг ўзи етарли. Уларнинг наздида, киши мўмин бўлиши учун тил икрори ва арконларига амал қилишга ҳеч қандай ҳожат йўқ. Жаҳмийларнинг таълимотига кўра, ахли китоблар, Ҳирақл ва Абу Толиб ҳам мўмин саналиши керак бўлади.

Тўртинчиси, муржийлар бўлиб, улар: “Имон факат тасдиқдан иборат бўлиб, куфрга тоат таъсири қилмагани каби, имонга маъсият кор қилмайди”, деганлар.

Бешинчиси, карромийлик таълимотига кўра, имон факат тил билан иқрор бўлишдан иборат. Уларнинг имонга берган таърифларига кўра, мунофиқлар ҳам мўмин-мусулмон бўлиб коладилар.

Олтинчиси, Абу Ҳанифа, Имом Мотуридий, Абул Ҳасан Ашъарий ва жумҳур мутакаллимларнинг имонга берган таърифларига кўра, имон факат қалб тасдиғидан иборат. Яъни, тил иқрори ҳукмларни жорий қилиш учун шарт бўлади. Амал эса, комил имоннинг шартидир. Бироқ, бу иккиси имоннинг таркибий қисми эмас. Бу қарашга кўра, имон яхлит нарса бўлиб, у бирор нарсадан таркиб топмаган.

Еттинчиси, уч мазҳаб имомлари ва жумҳур мұхаддислар наздида имоннинг таърифи қуидаги: “Имон қалб тасдиғи, тил иқрори ва арконларга амал қилишдан иборат”. Бу ва ундан олдинги қараш вакиллари ахли сунна валжамоа тоифаси дейилади. Улар орасидаги мазкур фарқ ҳақиқий эмас, балки лафзийдир. Умуман олиб қарагандা, айрим ахли сунна валжамоа уламолари имон ҳеч нарсадан таркиб топмаган десалар, бошқалари имон уч нарсадан таркиб топган, дейиллар. Яъни, ҳанафийлар ва жумҳур мутакаллимлар имон мұраккаб бўлмаган нарса десалар, уч мазҳаб имомлари ва жумҳур мұхаддислар имон уч нарсадан таркиб топган, деганлар. Жумладан, Имом Бухорий раҳматуллохи алайҳ ҳам ўзининг “Саҳиҳи Бухорий” асарида имон уч нарсадан иборат эканига оид кўплаб далилларни жамлаган.

Уч мазҳаб имомлари ва жумҳур мұхаддисларнинг имонга берган таърифлари зоҳирий жиҳатдан мўътазилий ва хорижийларнинг таърифига ўхшасада, бу факат лафзий ўхшашликдир. Бироқ моҳият жиҳатидан шоғенйларнинг қарashi мўътазилийлар ва хорижийларнинг қарashiдан тубдан фарқ қиласди.

Чунки мўътазилий ва хорижийларда имоннинг мазкур уч унсуридан бири топилмаса, киши мўмин бўлмайди. Аникроқ қилиб айтсак, уларнинг таълимотида амалларни тарк қилган киши абадий дўзахда қолади. Шунингдек, ҳанафий ва жумхур мутакаллимларнинг имонга берган таърифи зоҳирий жиҳатдан муржийларнинг талқинига ўхшаса-да, бунда ҳам фақат лафзий ўхшашлик бор, холос. Чунки икки қараш вакилларининг сўзлари бир-биридан моҳият жиҳатидан тубдан фарқ қиласди. Ҳанафийлар ва жумхур мутакаллимлар амални зарурий деб билиб, уни тарк қилган кишини фосиқ, деб эътироф этадилар. Муржийлар эса: “Мўминга амаллар таъсир қилмайди”, деб эътиқод қиласдилар.

Имонга берилган таърифнинг зоҳирий ўхшалигидан келиб чиқиб, уч мазҳаб имомлари ва жумхур муҳаддисларни мўътазилийларга ҳам, хорижийларга ҳам ўхшатиш мумкин эмас. Худди шунингдек, ҳанафий ва жумхур мутакаллимларнинг имонга берган таърифидан келиб чиқиб, уларни муржийларга ўхшатиш ҳам мумкин эмас.

Умуман олиб қараганда, ҳанафийлар имонни қалб тасдиғидан иборат деб, уни яхлит, яъни мураккаб бўлмаган нарса, деб айтадилар. Ҳанафийлар бунга далил сифатида қўйидаги оятларни келтирадилар:

إِنَّ الَّذِينَ آمَنُوا وَعَمِلُوا الصَّالِحَاتِ كَانُوا هُنْ جَنَّاتُ الْفِرْدَوْسِ تَرَّا.

“Албатта, имон келтирган ва яхши амалларни қилганларга Фирдавс жаннати манзил бўлгандир” (Кахф сураси, 107-оят). Куръони каримнинг баъзи ўринларида имонга солиҳ амал атф (боғловчи) ҳарфи билан боғланган. Араб тили қоидасига кўра, атф муғояратни, яъни отиф билан маътуфнинг бир-биридан бошқа-бошқа нарса эканини тақозо қиласди. Шундай экан, амал билан имон бошқа-бошқа нарса ҳисобланади.

“Эркагу аёл, ким мўмин ҳолида яхши амал қилса, Биз унга яхши ҳаёт кечиртирамиз” (Наҳұл сураси, 97-оят).

Мазкур оятларнинг барчасида амалларни қабул бўлиши учун имон шарт қилинган. Демак, имон шарт бўлса, амал машрут (шартга боғлиқ қилинган) нарса бўлади. Араб тили қоидасига кўра, шарт билан машрут бошқа-бошқа нарса ҳисобланади.

Имон мавзуси доирасида тадқиқ қилинадиган масалалардан бири “Имон келтириш ақл асосида вожиби ёки нақл биланми?!” деган саволдир. Жумладан, Нуриддин Собунийнинг “ал-Бидоя” асарида шундай дейилади: “Аллоҳ таолога имон келтириш фарз, куфр келтириш эса ҳаром саналади.

Олимлар имоннинг ақл ёки нақл асосида вожиб бўлиши борасида ихтилоф қилганлар. Хусусан, ислом даъвати етиб бормаган ҳудудларда вафот этган кишининг тақдири борасида ҳам олимлар орасида турли қарашлар мавжуд. Шунингдек, цивилизация етиб бормаган ҳудудларда ўсиб, ислом етиб бормай, вафот этган кишилар узрлими ёки узрсизми? Фитратда яшаб ўтган кишилар борасидаги ихтилоф ҳам айни шундай” (Нуриддин Собуний, 1969).

Ботиний, рофизий, мушаббиҳа ва хорижийларнинг муҳаккималари: “Ақл ила ҳеч нарса вожиб бўлмайди. У билан имоннинг яхшилиги ва куфрнинг ёмонлиги маълум бўлмайди. Балки буларнинг барчаси шариат орқали маълум бўлади”, деганлар (Абул Баракот Насафий, 2011).

Мўътазилийлар: “Ақл имон келтиришни, неъмат берувчи Зотга шукр қилишни тақозо этади. Ақлнинг ўзи билан ҳукмлар собит бўлади”, деганлар (Нуриддин Собуний, ал-Кифоя фи ал-Хидоя, 2014).

Ашъарийлар: «Ақл билан бирор нарса вожиб ва ҳаром бўлмайди. Бироқ унинг воситасида айрим нарсаларнинг яхши ёки ёмон экани маълум бўлади. Ином Ашъарий наздида мукаллафга юклатиладиган барча ҳукмлар нақл орқали олинади. У ўзига “Биз то пайғамбар юбормагунимизча, азобловчи бўлмадик” (Исро сураси, 15-) оятини далил қилиб келтиради» (Абул Баракот Насафий, 2011).

Ином Абу Ҳанифа ва Ином Мотуридий: “Кулоқ эшитиладиган нарсаларни билиш воситаси бўлгани каби, ақл ҳам идрок қилинадиган нарсаларни англаш воситаси ҳисобланади. У билан айрим нарсаларнинг яхши ва ёмон экани, вожиб ва ҳаромлиги билинади. Мўътазилийлар ақлни мустақил ҳукм чиқарувчи дейидилар. Ҳанафийлар эса, ақл аслида ҳукмни ким вожиб қилувчи эканини ва Аллоҳ ҳукмларни жорий қилувчи эканини танитади, деганлар. Уларнинг талқинига кўра, расул – вожиб ва вожиб қилувчини танитгани каби ақл ҳам вожиб ва вожиб қилувчини танитади. Ҳанафийлар ақлни мустақил ҳукмни жорий қилувчи ёки инсониятни хидоят қилувчи сифатида эътироф этмайдилар. Балки уни фақат восита сифатида талқин қиласдилар.

Ҳоким Шаҳид ўзининг “Мунтако” асарида Абу Ҳанифадан нақл қилинган қўйидаги ривоятни келтирган: “Киши осмонлар ва ернинг, ўзининг, бошқаларнинг яратилганини кўргани учун Ўз ҳолиқини танимаслиги узр ҳисобланмайди. Фаръий масалаларда эса, у то ҳужжат келмагунича узрли ҳисобланади”. Абу Ҳанифа: “Аллоҳ таоло пайғамбар юбормаганида ҳам маҳлукотлар Аллоҳ

таолони ақллари билан танишлари вожиб бўлар эди”, деган. Бу қарашни аҳли сунна валжамоа олимлари қўллаб-кувватлаганлар. Абу Мансур Мотуридий ақлли гўдак борасида: “Балоғатга етмаган бўлса-да, Аллоҳ таолони таниши вожиб бўлади”, деган. Ироқлик ҳанафий мазҳаби олимлари ҳам Абу Мансур Мотуридийнинг қарашлари ни илгари сурғанлар (Нуридин Собуний, 1969). Абу Ҳанифа ва Имом Мотуридий мазкур нуқтада фикҳий масалалар билан эътиқодий масалаларни фарқлаётганини кўриши мумкин. Улар “Аллоҳ таолони таниш” масаласида барча оқил кишилар бирдек масъул эканини таъкидлаб, бу ҳақда баҳс қилганлар. Бироқ бошқа ақидавий ва фикҳий масалаларда бу мавзу кўтарилимаган.

Мотуридийлик таълимотининг айрим вакиллари “Қалам уч кишидан кўтарилган” ҳадисига биноан, гўдак балоғатга етишидан олдин ақида ва фикҳий масалаларнинг бирортасига мукаллаф эмаслигини қайд қилганлар (Нуридин Собуний, ал-Кифоя фи ал-Ҳидоя, 2014). Бироқ иккинчи гуруҳ олимлар мазкур ҳадисни фикҳий масалаларга буриб талқин қилганлар.

XII–XIII асрларда ақидавий мазҳаблар ва оқимлар орасида “имоннинг зиёда ва камайиб туриши” мавзуси қизгин баҳс-мунозараларга сабаб бўлган.

Абу Ҳанифа “ал-Фикҳ ал-ақбар” китобида: “Осмонлар ва ер аҳлиниң имони “муъману бих” эътиборидан зиёда ҳам, нуқсонли ҳам бўлмайди. Бироқ яқийн ва тасдиқ жиҳатидан кўпайиб, камайиб туради. Мўминлар имон ва тавхидда бир-бирлари билан тенгдирлар. Амалларда эса, бир-бирларидан фарқланадилар”, деган (Абу Ҳанифа, ал-Фикҳ ал-ақбар, 2004). Мазкур матндан “Бироқ, яқийн ва тасдиқ жиҳатидан кўпайиб, камайиб туради”, деган жумла қўшилиб қолган. Чунки у асл нусхада мавжуд эмас (Ваҳбий Сулаймон Ғовжий, 1998). “Васияту Аби Ҳанифа” асарида шундай дейилган: “Имон кўпайиб, камаймайди. Чунки унинг камайиши куфрнинг зиёдалашуви билан, унинг зиёдалашуви куфрнинг камайиши билан тасаввур қилинади. Қандай қилиб бир киши бир вақтнинг ўзида ҳам мўмин, ҳам кофир бўлиши мумкин? Мўмин ҳақиқий мўмин, кофир ҳақиқий кофир бўлади. Куфрда шак бўлмагани каби имонда ҳам шак бўлмайди. Аллоҳ таоло бу ҳақда шундай деган: “Ана ўшалар ҳақиқий мўминлардир. Уларга Раббилари хузурида даражалар, мағфират ва қарамли ризқ бор” (Анфол сураси, 4-оят). Бошқа бир оятда шундай дейилади: “Ана ўшалар

ҳақиқий кофирлардир. Ва кофирларга хорловчи азобни тайёрлаб қўйғанмиз” (Нисо сураси, 151-оят) (Абу Ҳанифа, Васияту Аби Ҳанифа, 2004).

Ломиший бу ҳақда шундай дейди: “Биз юкорида баён қилгандек, имон икror ва тасдиқдан иборат бўлса, у на кўпаяди ва на камаяди. Чунки икror ва тасдиқ кўпаймайди ва камайишни ҳам эҳтимол қилмайди. Ким солих амалларни имоннинг бир бўлаги сифатида талқин қилса: “Имон кўпайиб, камайиб туради”, деганлар” (Ломиший, 1995). Бу қарашни Фазнавий “Усул ад-дин” асарида тасдиқлаб: “Қуръони каримда имоннинг зиёда бўлиши ҳақида келган оятларнинг бир нечта таъвили мавжуд, деган. Биринчиси, саҳобийлар мужмал тарзда имон келтириб, тасдиқлаганлар. Сўнгра, босқичма-босқич фарзлар зиёда бўлиб боргани сари, уларга ҳам имон келтириб борганлар. Натижада, тафсилий имон эътиборидан имонлари зиёда бўлиб борган. Иккинчиси, ҳар соатда имонда бардавом ва сабит бўлиш – имонда зиёдалик саналади. Учинчиси, мўминларнинг ишончи ва ихлоси ҳар соатда зиёда бўлади. Саҳобийларга мўъжиза кўрсатилса, Расулуллоҳга, рисолатга ва ислом динига нисбатан имонлари янада зиёда бўлар эди.

Сифноқий “ат-Тасдид фи шархи ат-Тамҳид” асарида бу ҳақда шундай деган: “У ўзи мустақил зиёда ҳам, нуқсонли ҳам бўлмайди. Факат имондан воз кечиши билан у нуқсонга учрайди. Имондаги зиёдалик эса, унинг ўзининг мисли қўшилиши билан амалга ошади. Демак, тоат билан имон зиёда бўлмайди, чунки тоат имоннинг мисли эмас... Имон Аллоҳ таоло хабар берган нарсаларни азалий тасдиқ қилиш. Шундай экан, унда зиёда ва нуқсон тасаввур қилинмайди”.

Шамсиддин Самарқандий “ас-Саҳоиф ал-илоҳия” асарида имоннинг кўпайиб, камайиши борасида салаф ва халаф уламоларининг сўзини бирма-бир келтириб: “Аслида имон кўпайиб, камайиб туради. Унинг таркиби тоат киритилиши ёки киритилмаслигининг фарқи йўқ. Зеро, қалб тасдиғи қатъий эътиқоддир. У кучлилик ва заифликни қабул қиласи. Чунки эътиқодий масалалар оддийликдан бошланиб мураккаблашиб боради”, деган (Шамсиддин Самарқандий, ас-Саҳоиф ал-илоҳия, йили кўрсатилмаган). У ўзининг “ал-Маъориф фи шархи ас-Саҳоиф” асарида: “Ким бу масаланинг ҳақиқатига назар солса, имонда ўзгариш борлиги ва у кўпайиб, камайиб туришини эътироф қиласи. Бу айни шу мавзунинг сир-асори хисобланади”, деган (Шамсиддин Самарқандий, 2021).

Бу Шамсиддин Самарқандийнинг ўзига хос қараси бўлиб, баъзан олимларда тутга мазҳаби ва таълимотига мос бўлмаган фикрлар чиқиб турди. Бундай ҳолатларда “олимнинг фикри”, дейиш билан чекланилади.

Имоннинг кўпайиб, камайиши хақида Абул Муин Насафий (Абул Муин Насафий, ат-Тамҳид ли қавоид ат-тавҳид, 2006), Хаббозий (Нуриддин Собуний, 1969), Косоний (Алоуддин Косоний, 2021), Усмандилар сўз юритишиб, имон асло зиёдалашмайди ҳам, камаймайди деганлар (Алоуддин Усмандий, 2019).

НАТИЖА

Эътиборли томони шуки, XII–XIII асрлардаги мотуридийлик таълимотига оид манбаларда “имоннинг зиёда ва нуқсонли бўлиши” мавзуларида “ашъарийларга қарши ўлароқ”, деган ибора қўлланилмаган. Бироқ асар муаллифлари ушбу мавзуда айнан “шофеийларга хилофан”, деган иборани такрор-такрор келтирганларини кўриш мумкин (Нуриддин Собуний, ал-Кифоя фи ал-Ҳидоя, 2014). Бундан кўриниб турибдики, асл ашъарийлар имон камайиб-кўпайиб турди, демаганлар. Чунки улар имонга берган таърифларида амални имоннинг таркибий бир бўлгаги ҳисобламаганлар. Ақидавий қоидага кўра, “ким имонни мураккаб” деса, унинг нигоҳида имон камайиб-кўпайиб турди. Кимлар имонни басит нарса дейишса, уларнинг наздида имон доимо бир хил турди.

Ашъарийлардан Имом Розий, Имом ал-Ғаззолий ва Имом Ҳарамайнлар: “Имон зиёда ҳам, нуқсонли ҳам бўлмайди”, деганлар (Абдурраҳмон Ижий, нашр йили қўрсатилмаган). Имом Розий ва кўплаб мутакаллимлар имонни зиёда ва нуқсонли бўлишини қабул қилмаганлар. Чунки тасдиқда ўзгариш юз бермайди, деганлар. Ҳусайн ибн Шихобиддин Кийлоний (ваф. 889) тасдиқнинг ўзи зиёдалик ва нуқсонни қабул қилишини айтган (Абдурраҳмон Ижий, нашр йили қўрсатилмаган).

Шайх Мухийиддин Нававий айтади: “Бизнинг асхобларимизнинг муҳаққиқлари: “Тасдиқнинг ўзи зиёда ва нуқсонли бўлмайди. Шаръий имон зиёда ва нуқсонли бўлади, яъни хайрли амаллар сабабли имон зиёда бўлади, акси билан нуқсонли бўлади”, деганлар”.

Имонга оид ҳадисларни қуйида таҳлил қилиб чиқиш мақсаддага мувофиқ ҳисобланади:

Анас (р.а.)дан ривоят қилинади: «Расулллоҳ (с.а.в.) хутба қилганларида: “Омонатсиз инсонда

имон, аҳдсиз кишида дин йўқ”, дедилар» (Имом Баҳақий “Шуъабул имон” асарида ривоят қилган).

Абу Умомадан ривоят қилинган бошқа бир ҳадисда Расулллоҳ соллаллоҳу алайҳи васаллам: “Ким Аллоҳ учун яхши кўрса, Аллоҳ учун газаб қиласа, Аллоҳ учун берса ва Аллоҳ учун ман қиласа, у имонини камол топтирибди”, деганлар (Абу Довуд, Имом Термизий ривояти).

Ибн Масъуд розияллоҳу анҳудан ривоят қилинади: «Расулллоҳ соллаллоҳу алайҳи васаллам: “Омонатсиз кишида имон йўқ, аҳдсиз кишида дин йўқ. Муҳаммаднинг нафси изнида бўлган Зотга қасамки, банданинг дини тили тўғриланмагунича, тўғри бўлмайди. Унинг тили қалби тўғриланмагунича тўғри, бўлмайди. Қўшиниси бавоиқларидан омонда бўлмаган киши жсаннатга кирмайди”, дедилар. Шуда: “Эй Аллоҳнинг Расули! Бавоиқнима?”, деди. Узот: “Унинг зулм-ситами”, дедилар...» (Табароний ривояти).

ХУЛОСА

Мазкур ҳадисларнинг барчасида комил имон ҳақида сўз бормоқда, яъни ушбу ҳадислар “омонатсиз кишида комил имон бўлмайди”, деган маънони англатади. Мисол учун, бошқа бир ҳадисда масжиднинг қўшнисини намози фақат масжидда адо бўлади, дейилган. Ундан масжиднинг қўшниси мабодо уйида ўқиса, намози намоз бўлмайди, деган маъно англашилмайди. Балки масжидни қўшниси масжидда ўқимай, уйида ўқиса, намози комил бўлмайди деган маъно тушунилади. Худди шунингдек, мазкур ҳадисларни “омонатсиз кишида комил имон бўлмайди”, деб талқин қилиш лозим. Акс ҳолда, қўшнисига азият етказган ёки омонатга хиёнат қилган киши коғир бўлиши керак бўлиб қолади.

Имонга тегишли ҳадислар орасида, зоҳирӣ жиҳатдан муржиийларнинг қарашини қўллаб-қувватлайдиган, яъни зоҳиран “имонли инсонга гуноҳ таъсир қилмайди”, деган маънони ифодаловчи ҳадислар мавжуд. Жумладан, Расулллоҳ (с.а.в.) Муоз ибн Жабалга айтган ҳадисида шундай деганлар: «Ким “Аллоҳдан ўзга илоҳ йўқ, Муҳаммад Унинг расули”, деб чин қалбдан шаҳодат келтирса, Аллоҳ таоло уни дўзахга ҳаром қиласи».

Убода ибн Сомит (р.а.)дан ривоят қилинади: «Расулллоҳ соллаллоҳу алайҳи васаллам: “Ким Аллоҳдан ўзга илоҳ йўқ, У якка-ю ягона, шериги йўқ. Муҳаммад унинг бандаси ва расули. Исо Аллоҳнинг бандаси, расули ва чўрисининг ўғли,

Марымга ташлаган калимаси ва руҳи. Жаннат ва дўзах ҳақ”, деб шаҳодат келтирса, амали қандай бўлмасин, Аллоҳ таоло уни жаннатга киритади, дедилар» (Имом Муслим ривояти).

Имом Муслимдан қилинган бошқа ривоятда шундай дейилган: «Расуллӯҳ соллаллоҳу алайҳи вассаллам: “Ким Аллоҳ таолодан ўзга илоҳ йўқ, Муҳаммад Аллоҳнинг расули, деб гувоҳлик берса, Аллоҳ унга дўзахни ҳаром қиласди”, дедилар».

Мазкур маънони ифодаловчи кўплаб ҳадислар, зохиран мўмин кишига амалнинг зарурати йўқ, деган маънони англатгандек туюлса-да, унинг муқобилидаги бошқа ҳадисларни ўрганиб чиқиб, “чин қалбдан имон келтирган инсон қилган гуноҳларига яраша жазо олганидан кейин, албатта жаннатга киради, у ҳеч қачон дўзахда абадий қолиб кетмайди”, деган холосага келиш мумкин.

МАНБА ВА АДАБИЁТЛАР РЎЙХАТИ

1. Абдураҳмон Ижий. (нашр йили кўрсатилмаган). *Ал-Мавқиф фи илм ал-калом*. Байрут: Олам ал-кутуб.
2. Абу Сано Маҳмуд ибн Зайд Ломиший. (1995). *Китоб ат-Тамҳид ли қавоид ат-тавҳид*. (Абдулмажид Туркий таҳқики). Байрут: Дор ал-ғарб ал-исломий.
3. Абу Ҳанифа. (2004). *Ал-Олим ва ал-мутааллим*. (Зоҳид Кавсарий таҳқики) Байрут: Дор ал-кутуб ал-илмия.
4. Абу Ҳанифа. (2004). *Ал-Фиқҳ ал-акбар*. (Зоҳид Кавсарий таҳқики) Байрут: Дор ал-кутуб ал-илмия.
5. Абу Ҳанифа. (2004). *Vasiqiyat Abi Ҳанифа*. (Зоҳид Кавсарий таҳқики). Байрут: Дор ал-кутуб ал-илмия.
6. Абул Баракот Насафий. (2011). *Шарҳ ал-Умда фи ақида аҳли ас-сунна*. (Абдуллоҳ Муҳаммад ва Абдуллоҳ Исмоиллар таҳқики). Қоҳира: ал-Мактаба ал-азхария ли ат-турас.
7. Абул Муин Насафий. (2006). *Ат-Тамҳид ли қавоид ат-тавҳид*. (Муҳамад Абдураҳмон Шоғул таҳқики). Қоҳира.
8. Абул Муин Насафий. (2011). *Табсира ал-адилла фи усул ад-дин*. (Муҳаммад Анвар Ҳомид Исо таҳқики). Қоҳира: ал-Мактаба ал-азхария ли ат-турас.
9. Али ибн Усмон Ўший. (2011). *Бадъу ал-амалий*. (А. Пардаев таржимаси). Тошкент: Ўзбекистон халқаро ислом академияси нашриёт-матбаа бирлашмаси.
10. Алоуддин Абу Бакр Косоний. (2021). *Ал-Муътамад мин ал-муътакод*. (Энес Дурмуш Муҳаммад ва Усман Дўған таҳқики). Истанбул: Date Published.
11. Алоуддин Муҳаммад ибн Абдулҳамид Усмандий. (2019). *Лубаб ал-калом*. (Муҳаммад Саъид Ўзарварлий таҳқики). Истанбул: Туркия диёнат вакфи нашриёти.
12. Ваҳабий Сулаймон Фовжий. (1998). *Минаҳ ар-равз ал-азҳар фи шарҳ ал-Фиқҳ ал-акбар*. Байрут: Дор ал-башоир ал-исломия.

13. Жалолиддин Умар Хаббозий. (2006). *Китоб ал-бидоя мин ал-қифоя фи усул ад-дин*. (Одилбек таҳқики). Истанбул: нашриёт кўрсатилмаган.

14. Мулла Али Қорий. (2021). *Шарҳ ал-Фиқҳ ал-акбар*. (И. Абдураҳмонов таржимаси). Тошкент: Ўзбекистон халқаро ислом академияси нашриёт-матбаа бирлашмаси.

15. Нуриддин Собуний. (1969). *китоб ал-бидоя мин ал-қифоя фи ал-ҳидоя фи усул ад-дин*. (Фатхуллоҳ Хулайф таҳқики). Миср: Дор ал-маъориф.

16. Нуриддин Собуний. (2014). *Ал-Қиғғоя фи ал-Ҳидоя*. (Муҳаммад Орутший таҳқики). Истанбул: Дор ибн Ҳазм.

17. Саффор Бухорий. (2011). *Талхис ал-адилла ли қавоид ат-тавҳид*. (Анжелика Бродерсон таҳқики). Байрут: Муассаса ар-Райён.

18. Убайдулло ибн Муҳаммад Самарқандий. (1158). *Китобун аъзимун фи усул ад-дин*. Истанбул: миллет Женел Кутубхонаси.

19. Ҳусайн ибн Шихобуддин Кайлоний. (2011). *Шарҳ ал-Ақоид ал-азудия*. (Наззор Ҳаммодий таҳқики). нашр жойи: нашриёти кўрсатилмаган.

20. Шамсиддин Самарқандий. (2021). *Ал-Маъориф фи шарҳ ас-Саҳиф*. (Абдураҳмон Сулаймон таҳқики). Уммон: Халқаро ислом илмлари университети.

21. Шамсиддин Самарқандий. (иили кўрсатилмаган). *As-Саҳиф ал-илоҳия*. (Аҳмад Абдураҳмон Шариф таҳқики). нашриёти кўрсатилмаган.

